

## **Kenaikan inflasi mungkin dorong kenaikan kadar faedah pada separuh kedua 2022 – Penganalisis**

**Astro Awani**

**31 Mac 2022**

**Bernamea**

KUALA LUMPUR: Jangkaan peningkatan inflasi pada separuh kedua tahun ini mungkin mendorong Bank Negara Malaysia (BNM) untuk menaikkan kadar faedah, demikian menurut firma penyelidikan.

Dalam nota penyelidikan hari ini, Public Investment Bank Bhd (PIVB) berkata ia mengunjurkan inflasi keseluruhan melebihi 3.0 peratus, manakala inflasi teras pada 2.7 peratus pada tahun ini.

Selain peningkatan faktor kos global terutamanya minyak, bank pelaburan itu berkata inflasi juga akan meningkat berikutan impak susulan daripada lapan program rangsangan fiskal pada 2021 dan tempoh lanjutan bagi persekitaran kadar faedah rendah.

PIVB berkata inisiatif awam-swasta untuk mewujudkan banyak peluang pekerjaan pada tahun ini akan memberi manfaat kepada inflasi.

Ia berkata demikian bagi mengulas laporan tahunan terkini BNM yang mana bank pusat meramalkan inflasi keseluruhan untuk bergerak antara 2.2 peratus dan 3.2 peratus pada 2022 (2021:2.5 peratus) dan inflasi teras pada 2.0-3.0 peratus (2021: 0.7 peratus).

Menurut PIVB, cabaran daripada pandemik COVID-19 global dan pemulihan ekonomi yang baru bermula selepas krisis, mungkin mendorong BNM untuk mengekalkan dasar akomodatifnya pada separuh pertama 2022, selain turut dipengaruhi ketidaktentuan akibat konflik Rusia-Ukraine.

"Bagaimanapun, jangkaan kenaikan inflasi teras membawa kepada persekitaran kadar faedah yang rendah, keadaan yang boleh mencetuskan peningkatan kadar faedah pada separuh kedua 2022.

"Peningkatan yang berlaku juga turut didorong oleh situasi guna tenaga penuh pada 2022 dan langkah terdahulu untuk menghindarkan ketidakseimbangan kewangan," katanya.

PIVB berkata peralihan Malaysia kepada fasa endemik COVID-19 pada April ini akan menyokong pemulihan sepenuhnya sektor kritikal seperti perkhidmatan dan pelaburan swasta, justeru, pemulihan dalam pertumbuhan ekonomi pada 2022.

"Secara kritis, perbelanjaan besar membabitkan COVID-19 akan berakhir tahun ini dan paras siling hutang fiskal akhirnya akan direndahkan kepada paras sebelum krisis, situasi yang menggalakkan untuk penarafan berdaulat kita dan secara lanjutan, kos pembiayaan fiskal kita," katanya.

Meskipun terdapat inisiatif yang meluas untuk meningkatkan output, bank pelaburan itu berkata ia tetap berhati-hati berikutan risiko penularan COVID-19 selain potensi kemunculan varian yang membimbangkan.

"Gangguan bekalan dan ketidakseimbangan komoditi global juga boleh terjejas. Kelembapan ekonomi China kekal membimbangkan berikutan kesan limpahannya kepada perdagangan kita," menurut PIVB.

-- BERNAMA

**© 2021 Astro AWANI Network Sdn. Bhd. (535275-D) All Rights Reserved.**

Source: <https://www.astroawani.com/berita-bisnes/kenaikan-inflasi-mungkin-dorong-kenaikan-kadar-faedah-pada-separuh-kedua-2022-penganalisis-354553>